

Sumiginnaanerit pillugit nalunaaruteqartarnissanut kommunini ataatsimoorussamik oqarasuaammik aalajangersimasumik sianerfigineqarsinnaasamik pilersitsinissaq pillugu kommuninut isumaqatigiinniaqqullugit Naalakkersuisut peqquneqarnis-saannik Inatsisartut aalajangiiffigisassaattut siunnersuut. Sianerfigisinnaasatigut nuna tamakkerlugu kallerriutigineqartut tigooqqarneqartassapput, kommuninullu pineqartunut erngertumik ingerlateqqittarnissaat qulakkeerneqassalluni.

Ulloq unnuarlu sianerfigisinnaasap ilusilernissaanut Naalakkersuisut kommunit peqatigalugit aalajangiisinnaatitaassapput. Siunertarineqartoq, tassaasoq innuttaasut tamarmik pisariunngitsumik pisortanut sianersinnaalernissaat sumiginnaanernillu kallerriisinnaalernissaat taamaalilluni anguneqassaaq.

(Inatsisartunut ilaasorta, Naaja H. Nathanielsen, Attaviitsoq)

Akissut

(Ilaqutariinnermut, Naligiisitaanermut Isumaginninnermullu Naalakkersuisunut ilaasorta)

Siullermeerneqarnera

Naaja Nathanielsen-mut qujanaq siunnersuutip matuma saqqummiunneqarsimanera pillugu, tamatumuuna aqutissiuunniarneqarmat meeqqat ajornartorsiutillit kallerriutigineqartarnerat sunnuteqarluartumik pitsaanerulernissaa qulakkeerniarneqalernera siunertaamat.

Nalunaaruteqartussaaneq Meeqqanik inuusuttunillu ikorsiisarneq pillugu Inatsisartut peqqussutaat nr. 1, 15. apriili 2003-meersoq takuneqarsinnaavoq. Tassani takuneqarsinnaavortaaq, nalunaarutit kommunalbestyrelsimut ingerlatinneqartassasut. Taamaattumik kommunalbestyrelsi taannaavoq akisussaasoq qulakkeerininnissamit, eqqortumik tullerriaakkamillu kallerriutigineqartut tamaasa misissornissaat siunertaralugu aallartinneqarnissaat, meeraq, inuusuttoq ilaqutariilluunniit immikkut tapersorsorneqarnissaat pisariaqartitsiffiunersoq paasiniarlugu.

Inatsit aallaavigalugu Naalakkersuisut isumaqarput, kallerriinissamut toqqaannartumik oqarasuaateqalissaguni oqarasuaatissaq kommunit akisussaaffigisariaqaraat, ilusissaq ima ittoq malillugu, akissussasutut oqartussaaneq kommunini ataasiakkaani aalajangiisimaannartussanngorlugu. Ilaatigut pingaarutilittut akisussaaneq inisinneqarnissaanut isumalimmik nakkutilliinnermut tunngatillugu naammagittaalliuutillu ataasiakkaat pillugit, kallerriinernut tunngasunit sullissinernut tunngasut.

Naalakkersuisut siunnersuuteqartoq isumaqatigaa, karriutigineqartut suliarineqarnerini sunnuteqarluartumik immikkullu ilinniagalinnit pinngitsoornani tigummineqarnissaat. Isumaginninnermut nakkutilliisoqarfiup ukiuni kingullerni kommunini meeqqanit persuttaanerit, atonerluinerit paarsinerlunnerillu annertuut paasisimavaat. Paasisat, iliuuseqarnissatsinnut pisussaaffilerpaatigut, suliassat sakkortussusaat naapertorlugit aqunneqarnissaat pillugit meeqqarlu qitiutillugu suliaq ingerlanneqarnissaa pillugu.

Sullissineq sakkortusarniarlugu, Naalakkersuisut qitiusumik siunnersuisoqarfimmik pilersitsinikuupput, taakku kommunit meeqqat inuusuttullu ajornartorsiortut pillugit sullissinerinut siunnersuisarput. Kiisalu aamma 2016-mut Aningaasaqarnermut Inatsimmi ukiunilu missingersuusiorfinni nakkutilliineq annertusarniarlugu aningaasanik immikkoortitsinikuupput; immikkut meeqqanut- inuusuttunullu tunngasunut. Nakkutilliinerup

sakkortusarneqarnissaa piuaannartinneqassaaq kommunimilu ingerlatsinermi ajornartorsiutaasinnaasut siusinaarluni isumagineqarnissaat suliarisassavaat. Taassuma saniatigut nakkutilliisut kommunini sullissineq piginnaanngorsaqqinnissaat peqataaffigissavaat.

2016-mi ukiaanerani ataatsimiinnermi Naalakkersuisut naatsorsuutigaat meeqqanut inuusuttunullu ajornartorsiortunut tunngasumik inatsisissamut nutaamut siunnersuummik saqqummiinissartik. Inatsisissamut siunnersuut ilimannarlunnartumik isumaassaaq siunissami kommunit karriutigineqartut qisuariarfigineqarnissaat aalajangersimasumik piffissaliiffigineqartarnissaat.

Naak pissutsit pitsanngorsarniarlugit qulakkeerinninnermut tunngatillugu Isumaginninnermut nakkutilliineq pilersinneqaraluartoq, paasineqassappat kommuni soorlu meeqqanut inuusuttunullu tunngasut pillugit inatsit malinneqanngitsoq, isumaginninnermut aqutsinerup kingunerissavaa inatsimmik nutaamik Naalakkersuisut siunnersuuteqarnissaat, ima ilillugu Naalakkersuisut piffissami sivilisunerusumi sivilinnerusumilluunniit kommunimi isumaginnoqarfiup aqunneqarnera tigusinnaanngorlugu pissutsit iluarsineqarnissaasa tungaannut.

Taamaattorli Naalakkersuisut kissaatigillunnarpat pitsanngorsaanerit pilersinniarlugit kommunit qanimut suleqatiginissaat. Taamaattumik nuannaarutigineqarpoq kommunit nammineq sullissinerup sakkortusaavigineqarnissaa pillugu naliginnaasumik suliniutit arlallit suliniutigilersimammassuk. Qaasuitsup Kommunianammineq pigisaminnik qitiusumik kalerriisarfimmik pilersitsisimapput sullissivik.gl suleqatigalugu kalerriinissamut atugassamik quppernermik immikkut ittumik ineriartortitsilluni. Suliniutit pitsaasuupput, soorlu Naalakkersuisut tamanna tapersersoraat.

Soorlu eqqaaneqareersoq Naalakkersuisut siunnersuuteqartoq isumaqatigivaa, kalerriinissamut ajornanninnerpaamik aqutissiuunneqarnissaaq qulakkeerneqartussaasoq, meeqqap atugarissaarnera, peqqinnera ineriartorneraluunniit navianartorsiortinneqarpat. Taanna ilutigalugu Naalakkersuisut kissaatigaat ersarissunik sinaakkutaqarnissaaq innersuussutigalugu meeqqanut inuusuttunullu ikiorsiisarneq pillugu inatsisartut peqqussutaat kommunillu akornanni akisussaanerup aggutaarnissaa.

Naalakkersuisut uiggiullugu una siunnersuummut allannguutissatut saqqummiuppaat:

Naalakkersuisut kommunit suleqatigalugit kommunalbestyrelsinut oqarasuaatikkut allakkatigilluunniit kalerriinissamit pitsaaneruseqarnissaaq aqutissiuunneqarnissaaq pillugu periarfissinissaaq misissoqquneqarpoq, meeqqap ineriartornera peqqinneraluunniit navianartorsiortinneqarpat.